

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : YB DATO' SERI DR WAN AZIZAH WAN ISMAIL [PANDAN]

TARIKH : 13 JULAI 2020 (ISNIN)

SOALAN

Minta **PERDANA MENTERI** menyatakan persediaan dan tindakan yang diambil oleh Kementerian dalam menangani dan mengukuhkan keselamatan siber negara hingga ke peringkat individu berikutan peningkatan kes penggodaman semasa Perintah Kawalan Pergerakan (PKP) sebanyak 80.5% sebagaimana yang dilaporkan oleh *cybersecurity* Malaysia melalui Berita Harian bertarikh 26 Mei 2020.

JAWAPAN

Tuan Yang Dipertua,

1. Pada awal bulan Januari 2020, Kerajaan melalui Agensi Keselamatan Siber Negara (NACSA) telah mengambil langkah proaktif dengan mengeluarkan peringatan kepada semua agensi kerajaan dan agensi kritikal negara supaya membuat persediaan untuk menghadapi ancaman serangan siber yang dijangka meningkat berdasarkan trend global berikutan penularan wabak COVID-19.
2. Selanjutnya, semasa tempoh pelaksanaan Perintah Kawalan Pergerakan (PKP), NACSA dengan kerjasama agensi-agensi berkaitan melaksanakan pemantauan rapi secara bersepada dan berterusan. NACSA juga telah mengeluarkan tiga (3) peringatan (seperti di Lampiran 1) kepada semua pihak termasuk orang awam berhubung ancaman

siber dan tindakan yang boleh diambil untuk mengurangkan risiko ancaman siber serta memberikan khidmat nasihat dan bantuan teknikal kepada beberapa agensi Infrastruktur Maklumat Kritikal Negara (CNII) yang menghadapi insiden serangan siber.

3. Pada masa yang sama, Suruhanjaya Komunikasi dan Multimedia Malaysia (MCMC) dan Cybersecurity Malaysia (CSM) turut menerbitkan mesej-mesej kesedaran siber kepada pengguna Internet Malaysia yang bertujuan untuk memberikan kesedaran berhubung amalan dan etika keselamatan siber yang baik bagi tujuan menghindari serangan siber.
4. Berhubung persediaan dan tindakan untuk mengukuhkan keselamatan siber negara, Kerajaan telah membangun dan melaksanakan Pelan Pengurusan Krisis Siber Negara (NCCMP) yang menggariskan strategi bagi mengurangkan kesan serangan siber dan tindak balas yang perlu dilaksanakan oleh agensi-agensi kritikal negara.
5. Selain daripada itu, pelaksanaan Strategi Keselamatan Siber Negara (MCSS) dan Pelan Induk Kesedaran Keselamatan Siber Negara (PIKKS) yang dirancang bermula pada bulan Ogos 2020 ini juga akan meningkatkan lagi tahap kesedaran dan kesiapsiagaan negara dalam melindungi keselamatan siber negara.

Sekian, terima kasih.